



## Հուսիկ Արա

### Միայն քո սերը կարող է ասել

Երկիրը ձգում է ամեն բան  
և բերում ներքև,  
քո սերը միակն է երկրի վրա,  
որ ձգում է ինձ և տանում է վեր:

Միայն քո սերը կարող է ասել՝  
ուրացի՛ր քո հավատը,  
և ես կուրանամ,  
թո՛ղ քո տունը  
և ես կբաժանեմ իմ ունեցածը  
ու կհետևեմ քեզ:  
Չեմ ուշացնի հանձնել հոգիս, կամքս  
և ինքնությունը իմ,  
եթե պահանջես՝  
դավաճանի՛ր քո ես-ը:

Այդ քո սերը կարող է ասել՝  
մոռացի՛ր հայրենիքդ,  
և ես չեմ վիճարկի,  
չեմ երկմտի  
ու չեմ մտաբերի ուրիշ աշխարհ,  
որ դուրս լինի քո սահմաններից:

Քո սերը միակն է երկրի վրա,  
որ կարող է ձգել ինձ  
և ինձնից վանել ամեն բան.  
Իմ ընկերոջը,  
մերձավորին,  
իմ ընտանիքը,  
և այդպես կիսատ ու պակաս՝  
ինչպես ոչինչ,  
դարձնել ամբողջ ու կատարյալ:

Ինձ կարող է սպանել շատ բան,  
բայց կարող է կյանք տալ  
քո սերը միայն.  
ասել՝ վե՛ր կաց,  
և ես ետ կգամ ստվերների աշխարհից  
միս ու արյուն առած,  
որովհետև այդպես է գրված ինձ համար:

Երկիրը ձգում է ամեն բան,  
բայց երկրի վրա դու ես  
և ուրիշ ոչինչ: